

Զանգերի և զանգակատների վերաբերյալ հետաքրքիր վկայություններ են պահպանվել հայկական միջնադարյան աղբյուրներում: Հաղբատի զանգակատան մասին Կիրակոս Գանձակեցին գրում է, որ Համազասպը «շինեաց հրաշալի շինուած, ուր զզանգակս կախէին»³: Նույն զանգակատանը պահպանված մի արձանագրության մեջ ասված է. «Շինեցաւ զեղեցկազարդ տաճարս աստուծոյ՝ զարթուցանող փառաբանչաց տեառն...»⁴: Եղեզնածորի շրջանի Սպիտակավոր-Աստվածածին վանքի զանգակատան արևմտյան երեսի խորշի պատին գրված է. «ԹՎԻԻ: ՉԶԹ (1330): ...Ես Յովհաննէս եւ կենակից իմ Թաճն շինացաք զանկակս եւ զտուն նորա տուար»⁵: 1875 թ. Գնդեվանքի բակում, տնտեսական շինությունների առաջ բացված մի հոր-թաքստոցից հանված պղնձե սպասների և անոթների մեջ եղել է և մի զանգ (մոտ 32 կգ) հետևյալ արձանագրությամբ. «ՉԾԶ: ԹՎ. զՍարկաւագ քահանայ յիշէք ի Քրիստոս, որ ստացա քսա»⁶: Այդ հավաքածուից, դժբախտաբար, ոչինչ չի պահպանվել:

Արձանագրությամբ զանգեր են եղել Լեոնային Ղարաբաղի Մարգակերտի շրջանում՝ Եղիշ-Առաքյալ կամ Զրվշտիկ վանքում: Զանգերից մեկի վրա (կտորված է) պահպանվել է շատ հետաքրքիր արձանագրություն. «Յիշատակ ի զանկակս Ղազարին, որ է որդի Քրիգորին, է թոռն Եւրին. Յուսեփի որդի Պապին, որ է Պողոս թուղբեր (հյուսն). Ես Շահնա կարմրեցի (ձուլեցի). գինն է Գ թուման»⁷: Արձանագրությունն ուշ շրջանի է, սակայն մեծապես արժեքավոր, որովհետև այստեղ նշված են կաղապար պատրաստող և ձուլող վարպետները:

Գանձասարի արձանագրություններից մեկում ասված է. «ԹՎ. ՊԺ (1361) Իշխանութեամբ մեծի Իւանէի ես տէր Կոստանդ մեծ փափագանաւ զնեցի զզանկականիս, սուրբ ուխտս բերի»⁸:

Փոքր զանգ գտնվել է և Հաղարծնում, հանրահայտ կաթսայի հետ մեկտեղ, մոտ 32 կգ քաշով⁹: Լեոնային Ղարաբաղի Բանանց գյուղի մոտ գտնվող Թարգմանչաց անապատում հայտնի է XVII դարի մի արձանագիր զանգ հետևյալ տեղեկությամբ. «Յիշատակ է Ապովի որդի Խոճայ Ղազարին ի դուռն Բանանցայ սուրբ Անապատին թվ ՌՃԺԶ (1667)»¹⁰:

³ Կիրակոս Գանձակեցի, Պատմութիւն Հայոց, Երևան, 1961, էջ 115:

⁴ Կ. Ղաֆադարյան, Հաղբատ, Երևան, 1963, էջ 222:

⁵ Ս. Բաբխուդարյան, Դիվան հայ վիմագրության, III, Երևան, 1967, էջ 287:

⁶ Տե՛ս «Փորձ» 1877/78, էջ 358, Ղ. Ալիշան, Սիրական, վեներտիկ, 1893, էջ 107, Ս. Բաբխուդարյան, նշվ. աշխ., էջ 20:

⁷ Մակուր Բաբխուդարյան, Արցախ, Բագու, 1895, էջ 226:

⁸ Նույն տեղում, էջ 177—178:

⁹ Տե՛ս Նույն տեղը, էջ 369:

¹⁰ Նույն տեղում, էջ 285: Զանգերի վերաբերյալ մի հետաքրքիր հանելուկ է պահպանվել Ներսես Շնորհալու մոտ.

«Երկու եղբարք միմեանց նման,
Որք են շարեալ ի մի գերան,
Իբր զմահապարտ են ի կախման
Ժամէ ի ժամ զաղաղակ բառնան»: